

Pengurang tubuh diri enda nekul nampung pelajar

SAMARAHAN: Pengurang tubuh diri enda nyadika penekul nampung pelajar ngulihka degree baka mensia menyana bukai.

Teo Suat Nie, 21, seiku Orang Nyelai Pendiau (OKU) buta antara sekeda ari 3,700 nembiaik ke ngerijister diri belajar di Universiti Malaysia Sarawak (UNIMAS).

Ngembuan juluk deka nyadi lecturer, Teo ke asal ari Johor buta kededua mata maya umur iya manggai enam taun.

Lebuh dikerandau pemberita pengudah tembu 'Majlis Ikrar Pelajar Ambilan September 2013/2014 UNIMAS' ensana, Teo madahka diri gaga ulih nampung pelajar renggat tinggi ba UNIMAS.

Iya ngasaika diri ngembuan hak teulihka pemandai baka mensia menyana bukai lalu ngenggam gulung degree ungkup kemegah diri.

"Maya aku pulai ari sekula tadika kelia, enggau enda disangka kededua mata aku enda meda utai agi, maya nya umur aku enam taun.

"Ambis endur apai indai nganjung aku berubat, tang nyentuk ke diatu kebuah aku buta lalu enda ditemu. Sekeda lutur madahka urat saraf aku jai lalu bisi mega madah ketegal purih peturun, tang nadai seiku peturun kami buta," ku iya nusui enggau ati ti siru.

Teo ngambi latih 'Pengurusan Koporat' Fakulti Ekonomi lalu iya disikap enggau sebengkah komputer software ti mantu iya belajar.

Teo nembuka Pom Enam ba SMK St John, Setapak, Kuala Lumpur ke alai iya mega udah belajar ba Sekula 'Pendidikan Khas' dulu agi ari nya.

Seiku agi OKU, Nur Azman Junaidi, 20, ari Taman Sukma Petra Jaya, Kuching berasai temegah sereta gaga ati ketegal diberi awak belajar ba UNIMAS.

Iya ti puntul kaki ketegal penusah di jalai alun diasur pemantu UNIMAS ngena kerusi roda ba pengerami nya kemari (ensana).

Azman belajar ba Sains Komputer ke alai iya mega berterima kasih ngagai penyiru UNIMAS laban ti udah nyendiaka perengka ti chukup ngagai raban OKU baka iya.

Kemari (ensana), seduai Teo enggau Azman nerima jaku peransang ari Menteri Pengintu Pengelantang Pendiau, Orang Indu enggau Pemansang Ruang Bilik Datuk Fatimah Abdullah ngambika enda kelalu mikir pengurang tubuh diri nyadika penanggul ngulihka degree baka mensia menyana bukai.